



Majlis Ugama Islam Singapura

Khutbah Jumaat

1 Julai 2016 / 26 Ramadan 1437

Mengharap Penerimaan Tuhan

الْحَمْدُ لِلَّهِ الَّذِي أَنْزَلَ الْفُرْقَانَ وَ أَيْدِ النَّاسِ بِالْحِكْمَةِ وَ الْبَيَانَ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ شَهِدَ لِنَفْسِهِ
الْوَحْدَانِيَّةَ وَ الْإِحْسَانَ وَ شَهِدَ بِهِمَا مَلَائِكَتُهُ وَ الثَّقَلَانِ، وَأَشْهَدُ
أَنَّ سَيِّدَنَا مُحَمَّدًا عَبْدَهُ وَرَسُولَهُ الْمَبْعُوثُ بِالرَّحْمَةِ وَ الرِّضْوَانِ ،
اللَّهُمَّ صَلِّ عَلَى سَيِّدِنَا مُحَمَّدٍ وَ عَلَى آلِهِ وَصَحْبِهِ وَسَلَّمَ
تَسْلِيمًا كَثِيرًا. أَمَّا بَعْدُ فَيَا عِبَادَ اللَّهِ اتَّقُوا اللَّهَ حَقَّ تَقَاتِهِ وَلَا
تَمُوتُنَّ إِلَّا وَأَنْتُمْ مُسْلِمُونَ.

Sidang Jumaat yang dimulikan,

Tingkatkan ketakwaan kepada Allah s.w.t. dengan mentaati perintahNya dan menjauhi segala tegahanNya. Semoga Dia menerima segala amal ibadah yang kita laksanakan sepanjang Ramadan ini insyallah. Amin Ya Rabbal 'alamin.

Sidang jemaah yang dimulikan,

Hari ini, merupakan Jumaat yang terakhir dalam bulan Ramadan yang mulia ini. Minggu hadapan, kita bakal menyambut Syawal. Masa berlalu dengan begitu pantas

saudaraku. Kita belum tahu sama ada bakal bertemu dengan Ramadan sekali lagi atau pun tidak. Maka marilah saudaraku, kita bersama-sama bermuhasabah akan amalan kita sepanjang Ramadan.

Saudaraku,

Antara ciri dan sikap orang mukmin adalah dia merupakan hamba Allah yang menghargai kurniaan Allah s.w.t. Antara kurniaan Allah s.w.t. yang begitu berharga buat insan adalah umur dan masa yang dikurniakan Tuhan. Atas dasar itu Allah s.w.t. memberi peringatan berulang kali di dalam Al-Quran akan kepentingan serta nilai masa disisiNya. Allah berfirman:

وَهُوَ الَّذِي جَعَلَ اللَّيْلَ وَالنَّهَارَ خِلْفَةً لِّمَنۢ أَرَادَ أَن يَذَّكَّرَ أَوْ أَرَادَ
شُكْرًا

Yang bermaksud: *“Dan Dia yang menjadikan malam dan siang silih berganti bagi orang yang ingin mengambil pelajaran atau orang yang ingin bersyukur”*. [Surah Al-Furqan ayat 62]

Kita melihat juga di dalam Al-Quran dan Sunnah Nabi s.a.w. peringatan yang berulang kali berkaitan dengan harga masa dan umur kurniaan Tuhan yang terbatas. Oleh itulah, maka datang peringatan-peringatan akan kepentingan sering ingat akan kematian. Bukan tujuannya untuk menakut-nakutkan insan dengan kematian, bahkan dengan tujuan untuk membentuk peribadi dan jiwa mukmin yang memiliki daya

tahan agama yang kuat, untuk terus berusaha dengan sebaik-baiknya, dengan umur yang dikurniakan Tuhan. Nabi s.a.w. bersabda:

"إِذَا مَاتَ ابْنُ آدَمَ انْقَطَعَ عَمَلُهُ إِلَّا مِنْ ثَلَاثٍ: صَدَقَةٍ جَارِيَةٍ ، أَوْ عِلْمٍ يُنْتَفَعُ بِهِ، أَوْ وَلَدٍ صَالِحٍ يَدْعُو لَهُ".

Yang bermaksud: *"Apabila anak Adam meninggal dunia, terputus darinya segala amalannya, melainkan tiga perkara: Sedekah jariyah (yang pernah dia lakukan), ataupun ilmu yang dimanfaatkan dengannya (orang lain), ataupun seorang anak soleh yang mendoakannya"*. [Hadith riwayat Imam Muslim]

Saudaraku, kadangkala tatklala membaca hadith tersebut, kita tersalah faham. Kita menyangka bahawa hadith tersebut mengingatkan kita akan kematian semata-mata. Akan tetapi maksud sebenar hadith tersebut adalah untuk mengingatkan insan, bagaimanakah seharusnya seorang insan memanfaatkan kehidupannya di muka bumi ini. Ia bertujuan mengingatkan kita bahawa dengan setiap hela nafas dan nyawa yang masih ada pada kita pastikan kita melakukan kebaikan yang kesannya berpanjangan. Ini boleh dicapai antara lain melalui sedekah jariyah, menyebarkan atau berkongsi ilmu pengetahuan, mahupun membesarkan anak-anak sehingga menjadi generasi yang soleh dan solehah dan meneruskan tradisi agama yang baik.

Ini merupakan intipati ajaran Islam. Agar setiap muslim itu menjadi insan yang menghargai umur dan masa yang Allah kurniakan. Sepanjang kehidupannya beliau berusaha untuk menyumbang dan membawa perubahan. Semakin insan ingat kepada hakikat kehidupan dan kematian, semakin kuat dia bakal berusaha untuk memastikan bahawa kesempatan yang Allah kurniakan kepadanya tidak disia-siakan.

Saudaraku,

Maka pada saat dan detik ini, fikirkan seketika saudaraku sekalian, bagaimanakah Ramadan kita pada tahun ini? Adakah kita merasakan bahawa kita telah berusaha dengan yang terbaik pada Ramadan kali ini? Adakah kita telah berjaya mendidik diri untuk mengawal nafsu, hati serta anggota tubuh kita daripada dosa dan kejahatan? Bagaimana pula ibadah kita saudaraku? Sudahkah kita mula merasa lebih dekat kepada Allah s.w.t. kini setelah hampir sebulan berpuasa? Atau masihkah kita sama sahaja tiada merasa peningkatan keimanan mahupun keinginan untuk melakukan lebih banyak kebaikan? Jika sebelum Ramadan kita tidak begitu terasa untuk membantu mereka yang berada dalam kesusahan, adakah kita kini lebih peka dan sensitif terhadap nasib mereka sehingga kita terdorong untuk meneruskan usaha baik meskipun selepas Ramadan?

Subhanallah! Amat rugi! Amat rugi! Amat rugi! Sesiapa yang Ramadan tidak meninggalkan kesan dalam kehidupannya. Ramadan muncul tiba lalu berlalu pergi, sedangkan dirinya masih lagi berada seperti hal keadaannya yang sebelumnya. Tiada perubahan, tiada pengampunan, tiada kemaafan dari tuhan. Mengapa sehingga boleh terjadi sedemikian? Kerana mungkin, dirinya tidak menghargai nikmat masa bulan Ramadan, kurniaan Tuhan. Mungkin juga kerana, dirinya menyangkakan ada lagi peluang di masa depan untuk bertemu dengan Ramadan di tahun mendatang.

Saudaraku, perbanyakkanlah beristighfar kepada Allah pada saat-saat dan hari-hari terakhir Ramadan ini. Sekiranya terdapat kekurangan pada amalan kita, teruskanlah berusaha pada hari-hari yang terbaki dari bulan mulia ini untuk meraih pengampunan dan rahmahNya. Al-Hassan Al-Basri pernah berkata: *“Perbanyakkanlah beristighfar kepada Allah, kerana kita tidak mengetahui bila turunnya rahmat Tuhan”*.

Saudaraku,

Walaupun sekiranya kita rasa diri kita telah berjaya melaksanakan sesuai dengan perintah Tuhan dalam beramal sepanjang Ramadan, setiap mukmin tetap mengharapkan penerimaan Allah s.w.t. Tiada kepastian saudaraku, sehinggalah saat dan detik pertemuan dengan Allah. Allah

berfirman, menceritakan adab seorang mukmin dengan TuhanNya:

وَالَّذِينَ يُؤْتُونَ مَا آتَوْا وَقُلُوبُهُمْ وَجِلَةٌ أَنَّهُمْ إِلَىٰ رَبِّهِمْ رَاجِعُونَ ﴿٦٠﴾

Yang bermaksud: *“Dan orang-orang yang memberikan apa yang telah mereka berikan, dengan hati yang takut, (kerana mereka tahu bahawa) sesungguhnya mereka akan kembali kepada Tuhan mereka”*. [Surah Al-Mukminun ayat 60]

Ini merupakan ciri dan akhlak seorang mukmin dengan Tuhan. Dia menyerahkan segalanya kepada Allah s.w.t., tiada ruang dalam dirinya untuk merasa bongkak dan meninggi diri. Kita beramal, di waktu yang sama menjadikan Allah s.w.t. sebagai satu-satunya sandarannya dalam beramal. Kita berdoa agar Allah menerima amal ibadah, solat terawih, ibadah puasa dan segala amal ibadah yang kita lakukan sepanjang bulan ini, dan pada tahun-tahun yang mendatang.

Semoga Allah s.w.t. menerima segala amalan kita. Dan semoga Allah mengolongkan kita sekeluarga daripada golongan yang Allah kurniakan rahmahNya, dikurniakan maghfirahNya dan pembebasan daripada api neraka. Amin Ya Rabbal Alamin.

بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ
الْعَلِيمُ، أَقُولُ قَوْلِي هَذَا وَأَسْتَغْفِرُ اللهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا
فَوْزَ الْمُسْتَغْفِرِينَ وَيَا نَجَاةَ التَّائِبِينَ.